

德壯果公年譜

德壯果公年譜卷二十八

次孫花沙納恭纂

嘉慶九年甲子

四月初七日

公偕賽沖阿奏言臣等前因夥匪被勦由金盆凹遁入高
石牆曹家溝經三路兵勇合力併勦復竄於化龍老山之
油榨坪三岔溪恃險抗拒臣德楞泰知會賽沖阿楊遇春
等各帶乾糧不攜鍋帳入山由土地埢青龍寨太平寨三
路分投兜勦逐日拏卡進逼十七日我兵均距賊巢二三
十里不等中隔深溝一道正在設法進攻詎該逆見我兵

分路進逼是夜卽由老林竄向千澗坪

臣

等於五更時分

投並進乃該逆先於杉樹門總匯路口堆積木石據險設伏當飭令將弁兵勇仰攻搶撲數次均被滾木擂石下壓

共傷數十名勢難競上遂於對面山上各用礮位轟擊立

斃賊匪數名賊衆站立不住始退入老林藏匿乘夜走正

陽河板棚子向界嶺而逃我兵緊跟至兩扇門山下追及

賊尾斬殺賊匪十餘名賊衆遁進老林又擒獲帶傷賊匪

四名查明均係老賊當卽正法隨飛行知會豐紳探明迎

勦該逆被兵追急日夜狂奔又由青草坪走兩扇門竄至

渣渡河總未敢出箐林二十二日接准豐紳來信探知賊

匪逼近川界豐紳在南溪一帶扼截西面空出南路誘令竄入川境以便夾擊頃又探報該逆東走打鼓坪又遁入望觀臺老林該處在川陝界嶺之中延長數百里高峻七八十里數年來不但官兵從未經行卽往來各逆亦從未屯踞其中路徑極爲窄小馬不能行徒步亦爲艱險該處北通支河金雞河中走了家坪東焦河西出高蠍蝗後河臣等現令副將閻俊烈吳廷剛桂涵參將羅思舉祝廷彪遊擊李國棟都司高星文千總胡超等均各步行帶領兵勇三千五百名裹帶乾糧由大木梁小漆扒紅巖寨後河躡尾跟追令總兵劉瑞等帶領兵勇一千餘名由板棚子

馳赴界嶺犯截令總兵田朝貴參將李應元遊擊馬成林

都司龍必達守備張之仁等由平溪河羊肝河橫山子黃

墩自東抄進臣賽沖阿楊遇春督同總兵喜明等取道三

餘寨洞灣自西北兜剿臣德楞泰馬瑜直趨支河金雞河

自北向南前進該逆一經轟出無論竄往何處均可就近

截剿現在雖據安康等處拏獲探信賊匪打聽江岸官兵

信息但連朝大雨江水漸漲卽淺灘亦難躡渡該匪萬難

飛越臣又飛飭總兵楊芳達自祥等加意防範以期有備

無虞至各處搜捕零匪據總兵汪啟稟報外委劉天喜在

南江陳家峽拏獲零匪一名守備杜天忠在通江大溪河

硃批勅

搜獲一名外委王大偉在南江界上麥子坪搜獲二名均解送南鄭縣審訊又據四川臬司劉清副將羅聲皋稟報都司趙琴在大竹縣籌林溝內搜出零匪二名千總陳安邦在銀礦山等處搜獲二名再臣德楞泰前奏千總陳安邦軍功臧青雲王良等帶領鄉勇在川北通江之雲霧山搜出哨聚零匪逼至草廟子山梁該逆無路奔逃僞總兵樊國受等二十二名各棄械跪投乞命當卽飭令解赴綏定府交臬司劉清審訊詳報茲據劉清等錄供稟報覈辦前來臣查樊國受等二十二犯供詞雖稱均係先後被各號據去年分遠近不一其中皆係賊目示手因被兵追至

欽定平定回疆方略卷二十一
三
絕地無路可逃方行乞命實與詣營投首者有間似宜區
別辦理擬請

旨將樊國受等二十二名免其一死一概發往伊犁給額魯特兵
丁爲奴以示懲儆至前此賊匪搶撲守備王英之卡臣等

當卽密爲查察昨又面詢楊遇春據稱入仙河向未設有

卡座是日因恐賊匪撲營令守備王英帶領鄉勇二百名

在營前山邊拏卡一座以顧大營是夜大霧瀰漫該逆果

乘霧前來幸有卡座拒敵王英率同鄉勇槍箭齊發極力

堵禦該逆係翻後山老林繩向竹橋河東竄卡座未失臣

等查是日拏卡本爲楊遇春大營聲勢守備王英旣未失

卡亦未離營該員由鄉勇軍功歷陞今職八九年來管帶
鄉勇甚爲出力又素爲鄉勇等悅服現在前敵勦賊奮勉
可否額懇

鴻施量予寬免之處出自

天恩

諭曰連日盼望德楞泰奏報甚爲殷切本日始據遞到閻摺內所
敘情形該匪等甫經追逼又復翻山竄向界嶺德楞泰等督兵
躡勦總未得手額爾登保前已據奏行抵興安暫駐籌防其意
自以德楞泰等現在督兵截勦竣功在即心存退讓朕已諭令
卽日馳往德楞泰等不可意存鬆懈竟坐待彼到時辦理試思

伊等督勦已閱半年之久若必俟額爾登保到後始能奏功因人成事又有何顏此時賊匪竄聚界嶺之中據稱四面抄截又似官兵業已合圍惟當鼓勵將士設法轟出上緊殲擒務儘此四月中勦辦淨盡切勿再任潰竄致稽時日守備王英係鄉勇軍功前經出力此次賊匪乘霧撲卡猶能率勇堵禦賊係翻後山老林繞竄尙無失卡離營情事著免其治罪至零匪樊國受等二十二犯並不早行投首直至窘迫乞命本無可貸前經諭令俱不可赦若德楞泰等接奉前諭業經正法則已若尙未辦淨卽姑照所擬從寬免其一死發往伊犁給額魯特兵丁爲奴仍當分起發遣一面知會伊犁將軍俟該犯等到戍後飭令四

散安插勿使聚集一處如稍不安分卽行正法並咨照沿途地方官該犯等途中或有滋事脫逃亦卽正法不可稍事姑容

十六日

公偕額爾登保賽沖阿奏言臣額爾登保查匪蹤南竄之後距江岸已遠應卽趕緊探勦前進隨飭總兵楊芳酌留官兵數百名在於各渡口設卡查緝其餘官兵均令歸集交該鎮帶領在太平壩大道河班鳩關一帶漢江南岸往來巡緝如遇殘匪折竄就近迎擊仍可北顧江岸復飭沿江船隻不許停泊南岸隨帶同總兵王兆夢副將唐文淑侍衛百順彥不勒等帶領官兵於二十六日起程由火石

嚴取道輒坪向南進發途次據報連日殲匪又竄匿望觀臺老林知臣德楞泰派閻俊烈吳廷剛桂涵帶兵由小漆扒跟追賽沖阿楊遇春由深溝金竹園進剿總兵劉瑞由板棚子截剿田朝貴帶兵由漁溪河進剿臣德楞泰馬瑜由支河金雞河進剿或層層拏卡進逼或分兵覓路探搜各擒殺賊匪一二名不等惟該匪竄伏林內狡惡異常尙未得手並聞軍糧間有短缺臣額爾登保已飭將沿途滾運之糧星夜運往以資接濟初三日進抵漳河坪探悉臣德楞泰賽沖阿將營盤鍋帳馬匹留駐相距百里之金竹園丁家坪一帶均已親身挑帶兵勇入林督策各路

進勦臣額爾登保若帶兵前進既恐地方窄狹行走擁擠
且慮糧運不繼查現駐之漳河坪係通南天門青草坪要
路又通西北一帶必應扼截當分撥官兵飭留王兆夢帶
領在該處暫紮以張聲勢卽親酌帶侍衛將領弁兵於初
四日馳抵大木梁適臣德楞泰由望觀臺老林趕來相晤
當卽跪請

聖安臣額爾登保恭宣

諭旨臣德楞泰跪聆之下感激悚惶並告知連日與賽沖阿楊遇
春馬瑜各帶官兵徒步入林分投進擊該匪知有官兵分
路人林又由紅巖寨逃竄初一日復親率副將閻俊烈桂

涵羅思舉等帶兵由三溪口冒雨進搜行抵打鼓坪遇有
賊匪數十人楊遇春等當卽率兵攬殺斃賊十二名餘匪
分逃老林內藍翎五品軍功李含香額外陳文郁帶兵入
林分搜於狹溝深林內突遇伏賊猝中弔傷陣亡兵勇亦
傷亡數名初二日該匪竄至兩扇門之西歡喜梁經田朝
貴帶兵趕到迎頭截擊當斃賊匪五名該匪不敢拒敵回
奔上元嶺大梁向東南逃竄初三日田朝貴帶兵勇由元
嶺跟追副將閻俊烈桂涵羅思舉等帶兵由旁路抄截又
獲活賊三名訊係陳賊當卽正法該匪被兵廝急連夜翻
山竄向石梅子河有入川之勢查石梅子河南走可逼高

觀寺西走可出南溪場均係八川要路豐紳帶兵現在南
溪場駐紮已飛行知會該提督探蹤截擊東走可通黃墩
橫山子仍係折竄入仙河化龍山之路總兵劉瑞現帶兵
在板棚子一帶已飭該鎮前赴八仙河防勦臣賽沖阿楊
遇春馬瑜督率田朝貴閻俊烈桂涵吳廷剛羅思舉祝廷
彪劉廷斌等各帶兵勇分爲三路仍皆步行尾躡如果賊
匪竄川臣德楞泰卽督率喜明等由南天門過川督勦若
又東竄卽就近向八仙河前進督率劉瑞截勦逞其狡
猾又折向西北有臣額爾登保飭留之總兵王兆夢帶兵
在漳河坪更可迎頭勦辦臣等現在惟有相機調度迅速

辦理至現餘賊匪不過三百多人其中半係積年勦散
陳賊并有曾充鄉勇夫役之人及土棍匪徒附和入夥該
匪等自知罪大奔竄偷生日久愈形狡猾於極高極險山
林之內輾轉避兵或乘夜假充探信兵勇或詐稱隨營貿
易民人誘破數家團結之小寨洞掠取糧食官兵躡蹤搜
至旋卽竄伏忽西忽東蹤迹無定甚至跟探弁兵鄉勇時
遇戕害目下官兵人人憤恨皆欲及早殲除提鎮將領每
於馬不能行之處卽徒步進攻日在深林之內向寨洞買
取包穀雜糧裹帶充飢以資輕便經旬搜剿出力殲心實
不敢偷安鬆勁臣等目擊情形實亦不忍再加嚴催各兵

丁賦性下愚出師年久去冬又涉厯冰雪搜勦過形苦累
間有動念思家經臣德楞泰諭以大義勸勉鼓舞各兵丁
仍照常出力嗣又加倍懸立賞格臨陣擒殺眞賊一名賞
銀五十兩卽給文凱撤回營歸伍審明被擄入夥者分別
給賞各兵丁鼓舞奮興昨又欽奉

諭旨擒殺積年賊目弔手者賞銀二三百兩至數十兩等因通行
傳知後更爲加倍踢躍臣額爾登保現又於接見兵勇之
際詳加開導各兵勇等無不感激

皇仁奮勉用命

同日公偕賽沖阿又奏言竊臣等欽奉三月十四日

上諭德楞泰賽沖阿馳奏官兵大獲勝仗殲斃賊目苟文華等並擒斬夥匪多名覽奏欣慰之至德楞泰著賞給白玉翎管四喜搬指白玉鼻煙壺鑲嵌寶石帶頭黃辮大小荷包賽沖阿著賞給白玉翎管四喜搬指瑪瑙鼻煙壺黃辮大小荷包以示獎勵等因臣等跪讀之下伏地感泣愧懼交深祇領叩謝

天恩敬將

賞件三分齋交楊遇春馬瑜吳廷剛等並遵照查明出力員弁及受傷出力之兵勇逐一分賞祇領訖伏念臣德楞泰受

恩深重此次勦辦無幾零匪竟至日久遷延咎戾滋深屢蒙訓誨策勵不加嚴譴已屬感報無地更叨

特命臣賽沖阿來營協勦仰仗

天威此次得以痛加擒斬挫其兇鋒然未能一鼓殲盡又復挺險奔逃乃蒙

錫賚駢蕃分頒珍品念餘氛之未淨實深憤懣於無能仰

湛露之渥施彌切悚惶而增愧且前此蒙

予展限又復

優加重賞

臣

等傳宣各路將弁兵勇無不感激思奮奈該逆自知

死亡在卽總藉老山箐林爲藏身之固我兵極力兜截每

不過小有殲擒又致逾期尙未竣事此皆臣德楞泰運蹇

福薄庸劣無能下不獲奠安蒼黎上不能仰紓

宵旰應謫

旨將臣德楞泰交部治罪以爲帶兵大員師久無功者戒
諭曰現在賊匪奔竄老林楊遇春等分路躡追德楞泰鼓勵士心
加倍懸立賞格自必格外振興但刻下已交夏令此二百餘殘
匪依險竄聚總未能掃除淨盡實深焦慮而額爾登保等宣力
多年此時尚在多方籌辦不能回家安享富貴朕心實深憐憫
亦不忍再行催促或致官兵轉有冒險輕進之事特恐官員兵
勇等未能盡悉此意當傳諭官兵以爾等從征數載備極辛勞
均蒙皇上洞鑒乃此起零匪無多偷竄稽誅迄今未淨皇上以
爾等久勞於外不忍降旨飭催特因賊匪狡恃老林蹤迹無定

轉瞬雨水載塗搜捕較爲費手若一日不能嚴事爾等一日不能歸家聖心殊爲憫念所以重懸賞格恩意有加爾等當同心協力奮勉殺賊務將餘匪迅速殲除即可早日還鄉骨肉團聚共享太平如此剴切曉示俾其知感奮自能爭先效命迅掃餘氛也至兵糧間有短缺額爾登保已飭將沿途滾運之糧趨行接濟所辦亦好軍行糧食最關緊要此次短缺是否係陝西省糧員遲誤抑係川省未能接濟卽著查明參奏並行知該省督撫轉飭糧員嗣後務須源源供運不得再有玩延又德楞泰自請交部治罪此可不必德楞泰從前督兵勦賊勞績懋著此時祇係搜捕未能得手豈肯因此遽加之罰額爾登保現已到彼惟

當勉之又勉會同籌酌俾得一鼓蕩平轉無庸以待罪爲詞致
形鬆懈至此次遇伏陣亡之藍翎五品軍功李含香額外陳文
郁均著咨部加等賜卹

二十五日

公偕額爾登保賽沖阿奏言

臣等昨會合一路籌商趕辦

額爾登保德楞泰由漳河坪鳳河腦一帶顧定北面陝

界接續

臣賽沖阿楊遇春馬瑜帶領鎮將跟蹤而進初五

日探悉該匪由石梅子河黃安壩朱槽河一路老林奔逃
雖已入川邊而正東翻越界嶺仍可入陝必須防顧遂商

令楊遇春帶領原兵取道正陽河平溪河會同劉瑞堵截

入陝之路

臣賽沖阿同馬瑜督率鎮將等仍跟蹤追勦初

六日追至龍坪探悉該匪於蓼葉溝乾溝巖一帶林內散

處避雨當卽冒雨衝入殺斃賊匪三名該匪見官兵分路

進攻捨死竄上九層巖向偏巖碥遁逸我兵覓路緊追又

斃賊匪四名生擒五名該匪竄入熟油溪老林維時雨勢

甚大山坡濕滑異常勢難前進當令兵勇撤至林邊暫紮

查訊獲賊分別辦理次日卽擬入林搜逼詎大雨如注

連日不止溪河處處漲發人馬不能淌渡賊匪並未遠颺

我兵亦不能前進臣等萬分焦急遂彼此熟商刻下殘匪

無多我兵計有萬餘名若一路會同趕勦實恐行走擁擠

且將領等帶兵在前其中孰爲用命孰爲因循恐有混淆
須責令分路趕辦庶人思自奮功過不辨自明當卽商令
臣賽沖阿帶領總兵喜明劉瑞副將閻俊烈遊擊李國棟

琥嘉驥李勝林等所帶官兵爲一路馬瑜等帶領總兵田

朝貴副將桂涵參將羅思舉遊擊涂陞都司高星文瞿心

能等所帶官兵爲一路楊遇春帶領副將吳廷剛參將祝

廷彪遊擊劉元明都司曹良臣朱承受等所帶兵勇爲一

路每路兵勇約有三千餘人或躡尾緊追或從旁抄截隨

時相機辦理十二日天色開霽水勢稍退探悉該匪翻熟

油溪後山老林南向黃墩七里架水寨子竄去臣賽沖阿

已同馬瑜由紅巖寨取道分投緊追楊遇春由平溪河老鴉鋪顧東抄進臣等查賊竄路徑東南可通湯桐二壩後

坪西可通高觀寺菜子壩等處均係川境惟東可通大小

榆河螞蝗壩又係折陝要道必須分兵督策庶爲有濟隨

商定臣額爾登保督率侍衛百順彥不勒圖勒畢善副將

唐文淑參將哈豐阿劉健標等帶領官兵千餘名卽由九

箇包取道八仙河一帶緊顧東北臣德楞泰督率參領豁

隆武副將馬元參將劉彪郭文魁遊擊劉廷斌等帶領官

兵千餘名卽由青草坪南天門取道南溪場緊顧西南總

視何路緊要卽就近移兵策應連日據各路探差及坐卡

兵丁陸續盤獲賊匪四名當卽正法並據四川臬司劉清副將羅聲皋稟報都司趙琴在漂江觜盤獲零匪二名外委胡大任在通江金溪河拏獲零匪四名又甯夏鎮總兵汪啟稟報遊擊伊星阿在廟壩盤獲零匪一名守備杜天忠在哨風樓盤獲零匪一名千總孫光烈在海口壩盤獲零匪一名均係勦散零匪已飭令於審明後分別辦理再臣額爾登保昨經過水關城地方查有貴州留養傷病官兵二百餘名當卽飭令隨同搜勦其實在傷病未痊年力壯强者九十餘名當卽飭令患病都司吳登祿帶回原衰者共一百零五名當卽飭令患病都司吳登祿帶回原

營以節糜費又副將桂涵所帶鄉勇二百六十餘名先後來營懇求領賞遣回臣等恐其中或有別情當卽傳集詢

問僉稱我們五六年跟隨桂涵打仗殺賊從不敢稍有退

縮近因數月以來日在老林追剿有臨陣受傷者有得受

疾病者每日爬山越嶺拏營設卡實在苦累情願領賞聽

候散遣歸農等語

臣等查該勇均籍隸川東川北臣德楞

泰現由南天門一帶進發卽將此項鄉勇帶至川境南溪

場酌給賞銀派員分起護送交臬司劉清查明原籍妥爲

安置

諭曰川陝邊界零匪上年原交德楞泰辦理因經半年之久遷延

不能嚴事是以仍簡派額爾登保前往以爲到彼之後自必一
鼓蕩平肅清喜報不日可至乃自十六日奏到與德楞泰等會
商勦辦之後迄今又及一旬本日所奏情形仍未得手以一萬
有餘之兵勇勦此二百餘名之零匪殲斃僅十餘人幸未續增
逆匪若再有脅從又如何辦理竟無嚴事之日矣且言該匪竄
入老林之後因雨水阻滯我兵不能前進竟任其盤踞林內毫
無辦法試思官兵不能淌渡賊何以又能冒雨奔逃不爲水阻
卽摺內所云分兵五路以三路之兵往前追勦以兩路之兵在
後策應者亦不過敷衍空言而另摺轉以鄉勇等涉厯險阻鞋
腳不敷請加給鹽菜銀兩鄉勇隨同勦賊如果奮勉出力朕亦

不惜重賞卽如前次降旨懸立賞格數目甚優何獨於此項鹽
菜銀數錢不加寬給但數月來該勇等觀望遷延所謂出力者
安在豈該勇以官軍勦辦零匪惟仗伊等出力此時竟欲居奇
若不多給賞銀遂不盡心辦賊是以零匪未完爲伊等挾制
之計若云該勇等駑驚不馴恐其去而從賊曲爲此安頓之法
則將來零匪勦淨之後此等鄉勇又將如何安頓耶此時勦捕
原不專恃鄉勇如有實在不願隨征者原可先爲遣散摺內所
稱桂涵一路川勇二百六十餘名先後來營懇求遣回此項鄉
勇應卽酌量賞銀令其歸里並著額爾登保查明此外如尚有
不願隨征者亦一體賞銀遣回知照地方官妥爲安插其實在

情願隨征者並當諭以事屆垂成尤當加倍奮勉爾等如果打仗立功皇上卽加倍施恩亦無不可但無功濫賞則斷乎不能如此明白曉諭該勇等自必共知鼓勵至鄉勇口糧從前比兵丁得項較多是以不願入伍此時何以云較之兵丁得項短少前後所奏亦屬不符並著查明具奏所有此次奏請加給鄉勇口糧已交軍機處存記俟奏報勝仗到日再行降旨額爾登保所帶兵勇百倍於賊似此日復一日老師糜餉何所底止卽使國帑充裕亦不值如此耗費況目下帑項情形迥非昔比額爾登保等甯不知之豈身受重恩竟安心延緩一任國帑虛耗視同膜外耶伊等惟當激發天良速圖叢事若有難辦之處亦不

姑據實奏聞候朕指示

五月初八日

公偕額爾登保賽沖阿奏言

臣等昨將殘匪追入川境分

兵三路緊追

臣額爾登保德楞泰亦分路督飭現在賊匪

無可掠食非冒充兵勇向寨洞覓食卽乘夜破寨搶掠必

須設法杜絕遂派令都司史定川守備謝金章分帶兵勇

百名在於沿山寨洞設伏連日據報該匪竄過黃墩之水

寨子前來攻撲俱經擊退該匪卽向興隆寨逃逸又乘夜

前來攻寨經設伏之外委張富率同寨民擊斃賊匪一名

又有賊匪一名假充官兵赴余家洞買食經伏兵盤獲送

營審明正法該匪由西溪口寒坡埢七里坪一帶奔竄

臣

賽沖阿馬瑜田朝貴等由銅罐包老林緊追擒獲賊匪一

名訊據供稱賊營實在矛手二百三四十人餘外又有些

被擄的人現在要逃往老木園老林躲避等語當卽正法

臣 賽沖阿等於十五日督兵追至龍潭河探報該匪已竄

向木旺坪楊遇春帶兵亦由老鴉鋪抄截而來查探賊蹤

已在西南楊遇春卽帶兵向木旺坪跟追臣 賽沖阿等抄

赴鳳凰頭萬春河以防該匪北折於十七日至東白巖正

遇賊匪竄出當卽施放槍礮轟擊藍翎馬兵楊秀箭斃戴

翎項賊匪一名賊匪向南逃竄楊遇春亦卽帶兵趕到會

同追至紅池壩賊已竄向窄羅盤地方官兵於二十二日追至窄羅盤該匪又竄漆棚子二臺坪老林係太平開縣境內現因老林陰雨連縣道路陡險尙未得手臣額爾登

保連曰由八仙河趕抵太平之黃墩接准臣德楞泰知會

亦已抵修溪壩防顧西北所有前告遣鄉勇二百數十名

經檄調副將桂涵來營查收器械包封賞銀卽令管帶前

赴綏定會同臬司劉清分別遣交地方官安業該勇等就

道甚爲安靜伏思臣等前議分兵三路仍未能痛剿實深

焦灼之至匪蹤現已深入川境距陝邊三四百里臣額爾

登保自應就現有兵力趕赴前途親督勦辦現擬帶同侍

衛百順副將唐文淑等率領固原甘肅兵一千餘名自北而南一面探聽賊蹤一面差探楊遇春兵行所向歸併一路趕勦提督馬瑜總兵田朝貴所帶官兵共有三千名現在臣賽沖阿亦經統帶追勦臣德楞泰督率副將馬元等帶兵一千餘名並歸併提督豐紳一路官兵卽日顧定西北另走一路向南探進彼此知會總期將殘匪併力掃除至前在陝邊大小白河一帶滋擾零匪經官兵剿散總在老林藏匿十八日楊芳所帶官兵又搜獲一名臣額爾登保德楞泰已札調總兵達自祥帶兵前赴邊界與王兆夢聯絡在大小白河滄水河漳河坪一帶設卡巡緝其楊芳

所帶甯陝官兵已札知仍赴紫陽石泉一帶江岸巡防並
可巡緝南山辦理營務

諭曰據奏仍不過殲賊數名三路分兵總未得手額爾登保等以
不能痛勦心懷焦灼殊不知此聞發帑籌糧朕無一不預爲經
畫其焦灼較之伊等更切竟不能形於筆底苦心惟自知耳摺
內所敘分投搜捕祇稱帶領官兵並未提及鄉勇字樣自係額
爾登保等查看近來鄉勇不肯出力之故惟現在告遣鄉勇二
百數十名旣經收繳器械安插而此外尙有鄉勇六千餘人現
在是否仍令隨營將來究竟作何安頓額爾登保等尙未議有
章程若此時鄉勇可無需用卽當陸續散遣或一時未便全撤

亦宜預爲布置免致臨時周章國家設兵衛民本資敵愾之用
前此鄉勇幫助官兵奮勉出力是以優加鼓勵並未稍存歧視
今該勇等旣已心生觀望所仗全在兵力更應加以獎勵俾士
氣激揚如兵丁內有能殺賊立功者悉照從前擬定賞格分別
陞擢並著剴切宣諭使之倍知鼓勵再節次奏報不過二百餘
人今閱摺內矛手已有二百三四十人此外尙有被擄之人是
賊又較前稍增但各路官兵不啻數十倍於賊務須上緊籌辦
儘此五月一律蕩平六月內額爾登保將善後事宜料理妥協
卽行起程於七月朕啟鑾前到京以便隨扈木蘭行圍

十一日

諭曰額爾登保等勦辦殘匪屢經降旨飭催並令將如何散遣鄉勇及是否別有難辦之處據實陳明迄今未見奏到本日吳熊光奏報陝省大股賊匪已南趨雲陽開縣交界之沙沱子老林藏匿尙有小股賊匪數十人現自安康縣界向漳河坪丁家山一帶奔竄業經慶成派兵往堵等語此股零匪在陝省邊界奔竄額爾登保等自應知悉乃本月初八日奏到摺內並未提及惟據稱前在大小白河一帶滋擾零匪總在老林潛匿已札調達自祥帶兵與王兆夢聯絡巡緝究竟吳熊光所稱漳河坪竄匪是否卽係達自祥所辦一股抑或係從前閻俊烈勦贛未淨之賊現在何處竄匿實有若干人數有無爲首之賊近日官兵

有無擒斬均著查明速奏

十八日

公偕額爾登保賽沖阿奏言竊臣等分兵三路進發因二

臺坪老林地勢逼仄不能施展兵力商令楊遇春取道新

田壩三溪子從旁抄擊

臣賽沖阿與馬瑜率兵尾追恐該匪設伏伺襲當令兵勇處處擎卡又挑出奮勇官兵每五

六十人或百十人爲一隊各帶槍礮或在山坳或上山梁

向林內分投轟擊該匪不能存繁卽南向瓢廠合耳山由

茶山壩逃竄楊遇春聞信卽帶原兵兼程顧東南抄截

臣賽沖阿馬瑜田朝貴喜明帶兵由茶山壩閃塘埡跟追沿

途殺賊數名生擒宋金懷一名及被擄民人十名訊據宋
金懷供稱被官兵勦急大家商量要乘空往大甯寶塔一
帶逃竄打聽東南已有官兵不敢出去就在這山內藏躲
看定幾箇小寨乘夜偷破擄些糧食就叫寨民背負如今
矛手還祇二百三四十人擄的百姓也有一二百人今日
我押著新擄的背糧不意被官兵拏住等語當卽分別辦
理二十八日楊遇春兵至中岡嶺臣賽沖阿亦帶兵趕到
探報賊於昨夜竄至高坪復北折青灣子雪泡山遁入大
山老林查火山北通王家壩西北通旗桿山三排山東通
十里坪東北通濛濛溪道路分歧必須分兵截擊楊遇春

卽帶兵趕赴王家壩自北迎頭勦辦臣賽沖阿同馬瑜喜

明帶兵由大水瀉寒溪寺躡追又派田朝貴取道十里坪

帶兵抄截臣德楞泰趕抵三排山扼住西北臣額爾登保

由後坪趕抵婆羅山扼住東北濛濛溪之路並令參將哈

豐阿劉健標侍衛色克通阿挑帶官兵在於林內設伏截

擊臣等查看地利情形可期得手限於三十日夜半進兵

不期是夜大雨如注迨至黎明雨勢益大直至本日尙未

開霽兼以霧瘴迷漫對面莫辨楊遇春哈豐阿等設伏官

兵均於林內露處既不能進攻亦不能撤回目擊情形實

深焦懼臣等現在虔禱一俟天色稍霽如賊匪仍屯原處

卽奮力進攻儻又他遁亦卽設法趕勦再查從前小民團聚大寨有險要可據有槍礮可守洵杜絕擄掠之良法今川陝邊界小民見賊匪無多均由大寨分住小寨爲就近田廬便於耕作但現在殘匪總在該處一帶逃竄設屢被劫掠不惟蹂躪百姓亦恐賊數日增更不成事臣等雖於臨近寨洞安兵設伏其勢不能處處周密現已飛咨勒保方維甸各派員馳赴邊界勸百姓將小寨仍歸大寨以資固守又查陝省安康平利紫陽一帶現有總兵王兆夢達自祥帶兵防勦並搜緝大小白河零匪其迤西之西鄉南鄭沔甯邊界爲陝甘要隘亦有總兵九十汪啟國興阿分

段防堵可以無虞惟川境之開縣太平大甯地方遼闊且
多大山老林營汎官兵不能在在分布現雖歸併寨堡亦
須酌助兵力捍禦臣等現帶兵內川省官兵不過五六千
名難以分撥查川省額兵本有三萬餘名再酌調二三千
名前往駐紮既可借資防範而進剿官兵間有疲乏亦可
隨時更易至隨征鄉勇雖經臣額爾登保奏懇

天恩加給鹽菜銀兩究因苦累每起告遺之心連日楊遇春王英
所帶鄉勇已有百餘名至臣處懇請遣撤察其形狀藍縷
且多帶傷受病甚爲可憐已卽照例賞銀遞送安插恐川
省鄉勇似此者亦陸續而至旣經告遺留之亦不能得力

自應隨時散撤亦不得如此此時正在勦捕之際恐分撥稍有不敷若添調本省官兵實可接濟從征亦不致涉於張皇臣等彼此札商意見相同已咨明勒保在各標營預備官兵二三千名揀派得力將備管帶恭候

命下之日卽檄令前來用資分撥

諭曰額爾登保等自奏報分路勦賊情形後迄今已閱旬餘朕盼望之殷刻深焦塵本日四百里報到所敘連日分兵探勦情節不過殺賊一名生擒被擄民人十名賊匪除二百三四十人外又新擄百姓一二百人賊數竟添至一倍額爾登保等所辦何事現據摺內稱官兵連日爲大雨所阻不能前進一俟天色稍

審如賊匪仍屯原處奮力進攻儻又他遁亦卽設法趕勦等語殊不成話如此大雨官兵自亦可跟蹤追躡何至不能奮力進攻匪竟能冒雨前行官兵又何能遠遁若賊額爾登保等不過又爲將來追賊遲延自占地步此等敗殘零匪不但不能殲除又復輾轉奔逃致增裹脅均由伊等辦理延誤所致上年冬間德楞泰接辦時朕以該處零匪祇賸一二百人無難剋期辦淨乃德楞泰誤聽鄉勇詭計欲事招降予賊以暇坐失事機不得已又令額爾登保到彼幫辦額爾登保在京時卽再三婉辭及至到陝後聞德楞泰於三月初二日得有勝仗又欲避分功之嫌不卽會辦逮德楞泰屢次不能得手伊自

知難以坐視始行前往今自與德楞泰會合以來又閱月餘並未與賊接仗每隔十餘日奏報一次不過殲擒數人而賊數已添至一倍似此裹脅日增何時始能辦竣前因額爾登保等三人效力行間屢著勞績節經渥沛殊恩晉爵酬庸以昭優獎茲以萬餘兵力勦辦餘匪老師糜餉竟至一籌莫展此而不加黜罰何以肅軍紀而勵戎行此起零匪德楞泰勦辦最久其貽誤之咎尤重德楞泰著降爲二等侯革去內大臣降戴單眼花翎並革去紫韁賽沖阿係西安將軍早經派令前往德楞泰軍營幫同勦賊且係聯銜奏事之員非專聽調遣鎮將可比其獲咎亦重賽沖阿前賞輕車都尉世職著降爲騎都尉並拔去花翎

額爾登保馳赴該處會同督勦雖不似德楞泰等之爲時已久但到軍營後毫無振作咎亦難辭額爾登保著降戴單眼花翎並革去紫韁朕權衡伊三人貽誤輕重之咎分別降革以示薄懲額爾登保等務宜知感知奮迅勉歲功仍可復邀恩賞儻再泄泄沓沓任賊匪輾轉奔逃沿途勾結必將額爾登保等三人一併從重治罪不能稍爲寬貸矣其軍營隨同辦賊之提鎮將弁等員自楊遇春以下均著額爾登保傳旨嚴行申飭俾共知儆懼奮勉立功前此勦賊多藉鄉勇之力近額爾登保等兩次摺內均未提及鄉勇二字自係不能得力是以又請酌調官兵但伊等現在大甯太平一帶分路進剿何以不添調征兵轉欲

添兵分段駐防或因探得大甯等處有賊匪伏而未起抑或慮及鄉勇散遣後難保一律安靜有藉兵力防範此等情節亦不妨直行陳奏何必隱躍其詞今旣咨明勒保在各標營調取官兵二三千名卽著照所請檄調應用至所稱楊遇春王英所帶鄉勇有百餘名向額爾登保處懇請遣撤察其情形藍縷照例給銀辦理楊遇春王英所帶告遣者已有百餘名其未告遣者尙有若干及此外各路鄉勇不下數千名是否尙在隨營調遣抑係全不得力均未奏及其應如何籌畫安插之處並著妥議具奏其總兵王兆夢等所剿大小白河一帶零匪爲數無多曾否立時剿淨何以摺內並未提及此後得有勝仗卽由五百里

奏報若實在全數肅清卽由六百里馳奏以慰塵注

案先是

上以搜捕久延曾疊

諭陝撫方維

甸將公等辦理情形據實密奏至是月二十四日覆稱大股勦散之後所餘零匪皆積年猾賊加鄉勇湊聚而成於官兵虛實及追截攻擊之方無不洞悉而留陝之兵日久力疲又見他兵次第遣撤未免情切思歸以疲乏之兵辦狡黠之賊攀援險阻暑雨奔馳歲事稍遲實由於此至隨營鄉勇近因賊竄窮山驟馬衣物臨陣無獲實不能如從前出力而帶兵大員知其難恃亦不常令前敵勦賊即使該勇等存養賊自重之心似無所施其挾制其所以不卽全撤者祇因搜捕未竣恐其去而從賊蓋緣零匪未平暫留鄉勇非以鄉勇難散故留零匪也

六月初一日

公偕額爾登保賽沖阿奏言臣賽沖阿與馬瑜帶領官兵於初六日冒雨由長梁子甌帽頂取道進攻詎該匪瞭見

東北兩面兜圍嚴密乘黑夜大雨自火山南奔長槽向家

嚴樊家洞一帶老林逃向仰天窩臣賽沖阿與馬瑜田朝

貴喜明卽帶兵分路緊躡臣額爾登保聞信亦督同楊遇

春等冒雨進兵由朱提壩亂石窖三排山取道顧西抄截

臣德楞泰督同豐紳帶兵由甕坪老虎壩華院齋顧東抄

截查探該匪已於初八日竄過南坪場奔濫池子初十日

竄上徐家溝山頂臣賽沖阿等督兵直上各將備兵勇不

避矢石奮力卽攻當斃賊匪四名生擒九名該匪敗竄下

山適另路都司史定川帶兵由筲箕灣趕來又生擒賊匪

三名該匪卽向八把刀敗竄我兵分路追殺又於林中搜

獲四名當訊明將陳賊正法其被裹難民送回安插探報該匪竄走三柏嶺有出謝家壩之勢

臣德楞泰卽督同豐

紳帶兵由雪泡山風竹壩直抵七里坪抄顧東南

臣額爾

登保督同楊遇春帶兵由熊坂磴大塘口中岡嶺抄顧正

東乃該匪探知東南俱有官兵又折走鹿塘溪

臣賽沖阿

與馬瑜田朝貴喜明帶兵趕抵鹿塘溪該匪正在攻圍朝

陽寨一見兵到卽竄上九道拐老林憑高抵禦我兵槍箭

齊發奮力仰攻該匪膽敢下壓將弁兵勇人人憤恨與賊

在密林內攬殺一處當殺賊七名擊斃執藍旗賊目一名

賊匪中箭著槍者甚多頓形慌亂紛紛敗竄我兵乘勢追

殺又斃賊匪五名生擒四名該匪竄入玉荷塘老林因天
黑林深雨大未便深入撤出林外暫紮備弁兵勇有身受
矛石傷者輕重不等查該匪現奔之玉荷塘老林東北可

通七里坪

臣德楞泰

於十二日帶兵已至七里坪老林中

紮營距賊不遠其東面白沙河另行派兵堵截惟北折可

走羊古巖關廟山

臣額爾登保

十三日已冒雨趕回高坪

飛飭楊遇春帶兵赴小茶園九嶺子緊扼西北之路又派

總兵劉瑞參將哈豐阿侍衛色克通阿帶兵馳赴

臣德楞

泰處分路進攻無如自十二日起至十四日大雨傾盆日

夜不止我兵在雨中穿越山林分投進發急切不能得手

惟盼日內天色稍晴分投競進不敢有意遲緩又據提督
豐紳稟報在柏森坪殺斃賊匪一名生擒九名又據臬司
劉清稟報在鄰水地方搜捕賊匪九名均經訊明分別辦
理至臣等昨奉

諭旨令將有何難辦之處據實直陳伏查賊匪衆多之時尙擇路
行走官兵趕赴要道扼截往往即可得仗今賊匪愈少奔
竄愈滑惟恃險山陡壁避兵延喘其行走處不惟人迹罕
到亦從前賊匪所不到每日令提鎮將領帶領兵勇徒步
入林跟追臣等於林外覓路抄勦稍資馬力然每遇淌渡
溪河或山徑陡險馬不能行徒步攀躋幾遭傾險臣等亦

不敢顧惜偷安稍有鬆勁自提督以至末弁無不盡力兵
勇則涉水登山攀藤附葛每日徧身霑溼甚至踵決履穿
凡遇指派從未稍形畏縮不可謂兵勇之不用命無如該
匪總避兵而行慣在深山密林內折竄倏東倏西蹤迹無
定再遇大雨益難進兵其不能迅速成功實原於此此外
再無掣肘情事臣等惟有仰仗

皇上天威勉竭駿駘設法趕辦如日內稍得天時地利必當早報
蔵功實屬臣等之幸

同日公偕額爾登保又奏言竊臣等欽奉

上諭鄉勇口糧從前比兵丁得項較多是以不願入伍此時何以

云較之兵丁得項短少著查明具奏等因伏查從前教匪滋事之時各省招募鄉勇每名月給銀三四兩不等尙有給安

家銀兩者需費浩繁辦理未能盡一自四年臣額爾登保

簡授經略以來查明各路征防鄉勇爲數甚多除將不得力者飭

令陸續裁汰外其留於前敵者均覈定每名月給鹽菜夫

價銀一兩三錢八分口糧一分其在地方防守有由各省

督撫司道招募者每名月給銀三兩令其自行買食不給

口糧厯來照辦在案自七年奉

旨減撤鄉勇臣等會議定將年力強壯技藝嫻熟者分撥附近原

籍營汛補以名糧但鄉勇入伍其初均各給守糧一分每

月僅領銀一兩俟當差奮勉漸陞拔戰糧馬糧分例始能
加增從前改勇爲兵之際原定卽歸各營當差一切循照
綠營定例將行糧裁去是守糧得項較之隨征時又減故
多不願入伍此時隨征兵丁無論馬步守糧定例每月連
加給鹽菜夫價等項應領銀二兩四錢一分鄉勇祇領銀
一兩三錢八分彼此相較未免鄉勇短少覈其難苦情形
兵勇實無二致是以懇

恩加給銀六錢二分以足二兩之數俾稍寬裕現所贖隨征鄉勇
陝省祇有一千二百餘名川省祇有二千五六百名統計
每月加銀不過二千數百兩如蒙

諭允尙不至過事虛糜而該勇等自倍加鼓勵

諭曰日來盛暑煩歎朕盼望捷報宵旰爲勞今日始據奏到亟加披閱此次各路官兵於徐家溝等處殲擒賊匪約共三四十名較之前數次之一無斬獲者差覺少勝然仍未能痛剿尙不值加以恩獎而於有無難辦情形經朕諄諄垂詢並無一語明言其故但稱再無掣肘情事空言覆奏閱摺內徒步攀躋幾遭傾險將弁依林露處兵勇等攀藤附葛徧身霑溼至於踵決履穿此種勞苦情形實屬可憫朕亦不忍嚴旨督促現當大雨時行賊匪亦不能遠颺當趁其窮蹙設法籌勦況核計賊數合之裏曾者不過四百餘人所占地界諒亦不廣或扼要設伏或乘虛

拏卡縱不能兜圍痛剿豈並不能躡探路徑爲掩襲截擊之計乎又另摺覆奏鄉勇得項每月給領銀一兩三錢八分較之兵丁短少著卽照所請加給銀六錢二分俾得少形寬裕但此時餘匪無多隨征鄉勇現存不下四千名趁此官兵未撤時擇其老病不能得力及情切思歸者酌量先行裁遣則人數旣少卽可於隨征額兵缺出時撥令入伍若因守兵得項較少卽以之超補馬糧戰糧亦無不可該勇等從征數年著有勞績卽干把職官頂戴尙且量功賞給豈必拘定營制由守糧漸次拔補乎如果伊等情願入伍或於額缺外添設戰糧馬糧若干分俟額兵缺出再陸續充補亦屬權宜之道庶該勇等餉項旣優生計

無缺益足以資鼓勵

初九日

諭曰本日方維甸奏採報賊情摺內據稱此起賊衆裹脅增多已有四百餘人竄入四川火山其紫陽之六道河另起零匪數十人現由十三灣竄入東椒河一帶亦近川境等語此起餘匪初祇二百餘人額爾登保等如果能迅速捕淨何致復行裹脅乃一味玩延予賊以暇今合之紫陽另起零匪幾不下五百人可見旬日來裹脅又復不少而額爾登保等猶不思奮力擊勦日事稽延幾於杳無音信前德楞泰督辦時尚有三月初二日勝仗一次殲賊多名額爾登保自會辦以來業已兩月有餘卽欲

如三月內之勝仗亦不可得伊二人所辦何事試思賊衆從前
充斥時有如是之累月而不接一仗不殺一賊者乎若果如此
遲延何能將數十萬賊衆殄除耶看來此次師疲日久非由將
士不肯用命竟係伊等督催不力賞罰不明所致卽山林陡險
兵力難施亦當悉心設法或用火箭焚林或斷賊之樵汲掩伏
兜圍鼓勵官兵一鼓作氣自能痛掃餘氛乃祇知尾追轉將勸
諭居民以小寨歸併大寨等事爲亟殊不可解額爾登保等著
傳旨嚴行申飭儻再有怠緩朕必執法從事懔之慎之

初十日

公偕額爾登保賽沖阿奏言竊臣賽沖阿緊逼賊蹤在玉

荷塘林外拏營暫紮欲俟雨勢稍止卽行進攻詎該匪於夜間乘霧雨之中竟敢前來偷撲營卡幸我兵早有準備截斃賊匪二名該匪敗竄我兵又用槍礮轟擊斃賊一名生擒一名時已四更昏夜莫辨且林密不能深追仍撤回營卡十六日五更發兵向玉荷塘土地磡一帶進逼施放排槍以冀轟賊出林該匪因逼勦緊急竄走白沙河臣德

楞泰早經督率豐紳在白沙河拏卡遏截該匪不能衝過卽折奔山王廟適臣額爾登保派令總兵劉瑞等帶領兵勇八百名冒雨至彼放槍迎擊該匪捨死衝撲數次貴州兵丁徐上才揮刀衝入賊羣砍斷賊矛四根殺賊一名該

匪敗向亮埡子一帶遁去楊遇春探得該匪西奔卽帶兵由八面溪滿月槽一帶抄擊

臣

額爾登保督兵策應而進

楊遇春兵抵老虎壩哨探兩旁密林叢竹中隱有伏賊當

令兵勇施放槍礮賊匪零星散竄我兵躡尾緊追生擒賊

匪戴玉貴一名訊係戰手並據供稱我們胡元帥右肋帶槍傷很重已經死了其餘戰手帶槍箭傷者共有二十多

人昨夜拚命過河被水衝去張總管並戰手等二三十人

此時想要走馬家營雞鳴寺往北逃入陝邊等供當卽正

法楊遇春仍帶兵緊追

臣

額爾登保督兵繼進於路經八

面溪乾溝梁大山時適遇大雨該處亂石橫木填塞滿路

兼之山勢極高兩旁盡係細竹密林有路之處又皆羊腸
鳥道下面懸巖萬丈擁擠難行雨後梁頂泥深過膝馬隊
官兵及臣與各官員馬匹陷跌殆盡衆官兵扯引下山鍋
帳一切全行落後臣查賊匪欲由雞鳴寺北逃有入陝之
勢關係緊要雖有楊遇春躡追仍須趕往督率遂將已經
趕到之兵一千名令劉瑞哈豐阿百順彥不勒色克通阿
等帶領隨同前進酌留副將唐文淑侍衛圖勒畢善在滿
月槽查收落後兵丁並倒斃驃馬數目收集鍋帳再行繼
進途次據楊遇春差兵迎報我兵緊躡賊尾將抵雞鳴寺
該匪卽竄出仙女池大山時已酉刻遂趕赴涼風埢菜子

壩一帶抄出賊前勦辦臣額爾登保因卽督兵由柏森坪

修理山一帶督率進發臣德楞泰賽沖阿亦督同馬瑜田

朝貴豐紳分路趕到該匪本在新開場老林游奕是日翻

青草坪老林南折黃金坪趨線朗坪臣德楞泰賽沖阿卽

督率官兵趕至線朗坪立行進攻槍箭齊發立斃賊匪數

名餘匪敗上二蹬巖我兵又乘勢搶上該匪遁入放馬廠

老林官兵現卽深入窮追臣額爾登保又添派參將哈豐

阿侍衛色克通阿帶領奮勇兵五百名趕赴楊遇春一路

幫同迎剿臣額爾登保亦卽督率繼進連日欽奉五月初

上諭仰見

聖心盼捷焦勞無時或釋

謹諱垂詢有何難辦之處

臣等前次奏報曾將不能迅速成功實

情具覆至鄉勇一項現在隨同川陝官兵供征者不過三

千餘名節次告請遣回者已據各原籍地方官報稱均屬

安靜此後散遣之法除情願入伍並充當民壯自應仍照

奏定章程辦理其甘願歸農之人一並收繳器械照例給

予賞銀交地方官安插果能隨時稽察自不至復流爲匪

卽現經獲犯研訊亦並無遣散之勇投入賊營情事從前

賊內有曾充鄉勇之數十名據供有被官兵殲斃者有已

經亡故或逃散者所贗實不過二三十名此時賊中湊聚
究係打散零匪居多眞賊仍祇二百餘人等語所供似尙
可信臣等惟有留心體察隨時防範斷不令現有鄉勇滋

事至吳熊光所奏漳河坪丁家山有零匪數十人一節臣

額爾登保前因大小白河零匪雖經派令總兵王兆夢搜
捕恐其勦急分逃是以西面札令達自祥探蹤協捕又札
知提督慶成就近偵探如該匪東遁卽幫同勦辦各在案
連日因臣等在老林追逐文報繞遞稽遲昨甫據王兆夢
達自祥稟報大小白河零匪節次殲斬後該匪向東南漳
河坪丁家山一帶逃遁王兆夢於十四日親率兵勇乘夜

掩襲又殺賊十餘名餘賊衝散分爲三起共四十一人由高馬荒板棚子一帶老林遁入川界黃墩後坪陝兵仍分投跟追等情臣德楞泰聞信又派令游擊畢萬年帶兵三百名前往搜捕核之吳熊光所奏零匪逃竄地方自卽係

此一股該鎮等稟內均稱係各股打散零匪及無業棍徒時分時合並無爲首之人川陝邊界山大林深一二零匪竄匿覓食乘間剽竊係屬必有之事是以臣等於川陝沿

邊處處留兵防守疊據總兵國興阿汪啟等稟報時有捕獲惟伏而未起之匪臣等帶兵周厯邊界並無聞見卽川

陝各地方文武亦從未稟過似不致再有萌蘖臣等現勦

零匪各路官兵相距皆近或躡尾追殺或迎頭截擊務期乘此勝勢一鼓作氣以期早得勝仗

諭曰從前額爾登保等總稱賊匪往往四散潛竄山林官兵無從圍剿此次該匪等前來偷營正當奮力殲殺乃祇斃賊三名生擒一名豈非坐失機會用兵之道全在乘賊之隙或霧雨交作或昏夜莫辨出其不意一鼓制勝若必俟天色晴霽又定須白晝時方可督兵剿賊萬無是理卽楊遇春一路亦祇殺賊一名其被水衝去之二三十人乃賊匪過河自遭覆溺何得爲官兵擊斬之功而額爾登保等猶稱乘此勝勢能無愧乎摺內據稱路經八面溪等處羊腸鳥道萬丈懸巖馬匹陷跌殆盡衆官兵

扯引下山等語看此情形不可謂不盡力卽額爾登保等亦實
艱苦備嘗時當盛暑煩熱卽馬匹陷跌致斃閼之亦覺惻然況
如此涉險官兵等自不免有所損傷實不忍再加懲治但毫無
布置僅事跟勦徒勞仍屬無益用兵以謀略爲先羽扇綸巾能
摧勁敵若恃勇輕進拚命相鬪是市井無賴之情形非制勝之
道也至鄉勇一項據稱賊營所贖賣不過二三十人是鄉勇之
從賊者比前較少更屬易辨總在額爾登保等隨時區畫以期
迅奏蕩平勿再稽延致干咎戾

二十日

公偕額爾登保賽沖阿奏言臣等昨督兵在線朗坪一二蹬

巖等處勦殺賊匪該逆敗竄放馬廠二十七日官兵分路進攻該匪膽敢在老林憑險擲石抗拒

臣賽沖阿同豐紳

馬瑜策勵兵勇奮力上搶槍箭所到眼見斃賊數名均被

該匪將屍身拖回我兵愈攻愈力該匪始敗向長房嶺逃

竄查看地勢盡係叢竹密林隨令兵勇一面施放排槍一

面砍路進逼該匪見我兵轟逼而進復捨死撲出兵勇等

在林內用刀矛與賊互相砍截當斃執旗賊目一名矛手

五名該匪力不能支始向包穀廠桃花埡竄去我兵追至

埡口沿途又擒獲三名

臣

德楞泰督兵策應我兵轉戰一

日且老林路徑險窄隨於林邊暫紮惟時

臣額爾登保派

出之參將哈豐阿侍衛色克通阿與楊遇春均帶兵趕到
楊遇春查看懸巖峭壁萬難仰攻當商令哈豐阿色克通

阿親勘險要處所分撥兵勇設伏又令副將吳廷剛參將

祝廷彪帶兵前赴獅子洞十里坪一帶依傍老林設伏臣

額爾登保又於存營兵丁中挑派五百名每百名爲一隊

不帶鍋帳分赴貝母池青草坪觀音洞新開場等處在老

林向內設伏以杜該匪乘間北遁二十九日夜半該匪欲

從小寒溪老林竄出哈豐阿等隨令兵勇施放槍礮轟擊

該匪仍折回老林天明查看林外有擊斃屍身二具初一

日據臣額爾登保派往貝母池設伏之守備保元龍差兵

高貴魏炳泰來營稟報前赴老林探賊於長槽地方遇見

執矛賊匪三名當卽向前擒獲劉明盛一名其二人滾巖

脫逃臣當將劉明盛嚴訊據供我們昨夜欲由小寒溪竄

出又被官兵槍礮轟回大家商量由貝母池北走王家壩

差我前來探路等語當卽凌遲處死隨將匪蹤飛行各路

臣德楞泰賽沖阿得信督率豐紳馬瑜田朝貴喜明各帶

兵勇分路由苦草坪郭耳坪向家巖穿越老林隨修隨進

林中處處懸巖窄徑險峻異常臣賽沖阿與豐紳馬瑜暨

鎮將等皆徒步督兵進逼直入大梁深處該匪不能存榮

又避向東趨初三日黎明參將祝廷彪守備齊慎挑帶兵

勇五百名入林分布預備掩襲詎該匪於峯頂伏匿哨見
祝廷彪等兵勇已過分爲兩起於午後潛向十里坪竄出
意圖攻撲營卡副將吳廷剛都司呂天俸當卽分督兵勇
截殺祝廷彪等聽聞槍礮聲響知賊匪已由林內逸出當
卽帶領兵勇趕回協勦賊匪見官兵前後截殺仍卽折回
老林我兵分投追擊斃賊九名生擒二名該匪現在有趨
乾溝河馬家坪之勢連日弁兵鄉勇中間有傷亡容俟查
明咨部辦理楊遇春現督同吳廷剛等抄赴馬家坪迎勦
臣額爾登保帶同劉瑞副將唐文淑等由修理山紅花梁
後坪顧北抄截臣德楞泰賽沖阿督同豐紳由荀子坪青

灣子分投前進總期卽得勝仗上慰

宸懷至總兵王兆夢所勦零匪前在丁家山被勦後分起逃入黃墩一帶現據該鎮稟報率同王英黃傑等搜至花椒坪大梁入林掩殺斃賊四名生擒七名訊據活犯供稱自前次分逃後零星會合共有二十九人今被衝殺祇餘十幾人已各自逃遁等語臣等飭將獲犯正法並令仍督將備分路搜拏以期根株盡絕

諭曰此次官兵分路進剿先後擒斬賊匪二十餘名且該匪於官兵搜捕時祇在老林憑險擲石抗拒並無別項器械可見勢已窮蹙人數亦未增添但我兵尚未能痛加截勦立予殲除殊不

滿意現在額爾登保另摺陳明舊疾復發每遇上前督率之時
實有力不能支之勢朕心深爲廑念已派乾清門侍衛慶惠帶
同御醫前往診視令其回至西安調理所有川陝邊界零匪卽
交德楞泰一人專辦並將欽差關防移交德楞泰收用此時零
匪若指日在川境辦完固屬甚善萬一被剿緊急竄至陝楚邊
界德楞泰當窮賊所向跟蹤追剿伊旣係欽差隨處調遣呼應
較靈一俟殘匪掃除德楞泰將關防交勒保收貯將來伊來京
瞻覲即可順便帶回不必特派員弁先行齎送賽沖阿現隨德
楞泰剿賊自當聽其調遣嗣後奏報軍務摺內不必列名至添
調川兵二三千名現據額爾登保奏稱並非因太平等處有伏

而未起之賊預爲設備祇係分段駐防等語此項兵丁與其扼要防禦徒助聲援何不於隨營征兵內擇其老弱疲乏者就近抽換俾勦捕更資得力再隨征鄉勇內陝省之一千二百餘名現已令額爾登保帶回西安分別安插其川省鄉勇二千三百餘名俟事竣後當與勒保會商遵照節降諭旨或令入伍或交州縣充當民壯或分給大小衙門令充雜役其願回籍者飭令該管官妥爲安置出具收管印結爲要其王兆夢所勦零匪已不過十餘人無難剋期勦盡德楞泰當飭該鎮等上緊搜捕並責成地方官一體嚴緝勿使一名漏網

二十九日

諭曰現據額爾登保摺內稱德楞泰因染患瘧疾轉成痢症頗難支持在開縣高坪暫紮服藥等語前因額爾登保舊疾復發當經降旨令其回至西安養病將欽差大臣關防交德楞泰接受以專責成今德楞泰又患瘧痢病勢較重著同至開縣上緊調治額爾登保仍帶欽差關防在彼督辦如德楞泰不日就痊可以督兵進剿仍應遵照前旨交與專辦伊卽回西安調養儻德楞泰一時未能痊愈現已降旨令英善署理四川總督勒保前赴軍營接辦軍務未到以前額爾登保仍督催將領上緊搜捕並著慶惠帶同御醫赴額爾登保軍營診視後卽赴開縣診視德楞泰病症

七月初九日

諭曰此次各路鎮將等帶兵驅勦先後殲擒賊匪二十餘名額爾登保等親身督率將弁兵勇冒暑涉險深入窮追而且人知憤恨士氣倍揚實屬奮勉出力朕不忍再加催促惟是奏報三省肅清係上年七月中旬之事彼時祇殲零匪二三百人今已閱一年而賊數並未稍減雖不過偷竄餘生而額爾登保德楞泰二人督兵在外日久未竣自提鎮以至將弁凡若干員帶領兵勇萬餘名搜捕經年迄未淨盡外間無識之徒必至傳說滋疑且使奸徒從而生心殊有關係此時德楞泰病已漸痊業經督兵探勦楊遇春舊傷漸愈正可帶兵殺賊額爾登保體氣羸弱

著仍遵前旨將欽差大臣關防交與德楞泰接收伊卽回至西安省城將撤遣鄉勇事宜料理完竣同京供職所有剿捕餘匪著責成德楞泰督率刻下已交秋令天氣高爽非溽暑煩歎大雨時行可比正當鼓勵將士多方設法務於七月內將此夥餘匪悉數殄除不可再有延緩又稱賊竄之路係履險蹈危若悉令官兵置之死地實屬可惜等語賊匪亡命奔逃不過欲倖逃顯戮豈有驅迫官兵冒險輕進陷於死亡之理惟在相機設法竭力籌勦試思該匪等日於大山林箐竄伏從何覓食自必向外偷破寨洞掠食爲生德楞泰等旣知其時時冒充官兵於寨洞探信何不卽於寨洞左右密行設法俟賊出掠時乘勢掩殺

自可得手此等機宜惟在隨時運籌調度豈可一味追蹤隨賊奔馳致疲兵力

十八日

諭曰額爾登保等奏連日趕剿賊匪雖殺賊十數名然總未能痛加殲戮上年中元日奏報三省肅清今又過中元而賊匪仍有二百餘人何時剿淨現在額爾登保已知會德楞泰前來面晤相機籌辦務須將大甯太平交界竄匿之賊於七月內一律掃除此時川陝鄉勇除情願入伍外陸續遣撤者又有數百名統計隨營征勇陝省不過八百餘名川省不過一千八百餘名額爾登保等因派調新兵三千名不日可到擬將川陝鄉勇一律

裁撤所見甚是新兵到營不但鄉勇應行撤遣卽兵丁中凡有
日久疲乏及傷殘病廢者均應分別澄汰酌量裁撤或恐新兵
初到路徑不熟則將舊兵酌留一半足矣現在餘匪不過二百
餘人新兵三千不啻十倍於賊況有各路舊兵協力勦捕可不
倍加奮勉剋日蕪事乎

二十三日

公偕額爾登保奏言臣額爾登保於初八日行抵高觀寺
初九日臣德楞泰亦帶兵到來彼此會晤臣額爾登保當

將

欽差關防一顆齋交並遵

旨將一切事宜逐一交代彼此熟商查

臣

額爾登保現帶滿漢官

兵二千餘名內擬將黑龍江官兵五十七員名歸併於

臣

德楞泰軍營共計尙有一百一十員名現無專員統領卽

於帶來之侍衛六員內將彥不勒富祥二員留於軍營管

帶又遊擊馬伏金都司馬仕相祁祥帶固原提標官兵共

八百餘名卽撥歸賽沖阿一路帶領其總兵劉瑞等現帶

之貴州官兵八百七十餘員名又參將劉健標遊擊馬鳴

玉等所帶甘州官兵三百七十餘員名

臣

額爾登保現在

帶領撤勇回陝亦須兵力彈壓擬將此兩項官兵統領回

陝查貴州官兵內多有六十年奉調湖南出征者亦有五

年續調來營者歷時已久擬俟將陝省撤勇辦竣卽令由
陝遣撤至於陝省官兵現在留營隨征者計賽沖阿一路
其有二千五百餘名楊遇春一路共有一千一百餘名現
均在川境勦賊其陝界防兵如總兵國興副將吳亨衍
遊擊德忠等分帶官兵共計四千五百餘名現在西面之
甯羌沔縣南鄭邊界毗連甘川處所設卡防緝總兵王兆
夢達自祥九十等分帶官兵三千八百餘名現在東面之
平利安康紫陽邊界毗連川楚處所設卡防緝統計現在
陝省征防官兵共一萬三千名惟總兵楊芳所帶防江之
甯陝鎮官兵係屬本轄不在此數臣額爾登保均卽逐一

開單交

臣德楞泰查照

臣

等復查隨征陝勇現在尚有八

百餘名其中籍隸川陝楚三省不齊

臣

額爾登保現已全

行撤回來營查明籍址擬卽遵照前奏分別散遣其川省

之勇

臣德楞泰擬俟陝省撤回之勇安妥後酌量情形再

行裁撤又查刻下殘匪總恃老林奔竄萬萬不敢直出平

原若仍以大隊分投入山必復被其牽綴

臣

等議定毋論

該匪竄往何省老林擬選奮勇官兵二千名分投跟勦以

免擁擠不拘何省地面窮其所向或抄或追隨時相機趕

辦令賽沖阿喜明帶領原兵二千餘名爲一路在於山外

左手隨賊所向探明截勦

臣德楞泰豐紳督率馬步兵勇

在於山外右手隨賊所向相機策應兼可顧及沿邊洞寨
絕賊擄掠如兩路之兵與賊相近又可夾擊似此官兵入
山辦賊雖覺稍曠時日究有把握如果賊匪深入陝疆仍
令豐紳帶領原兵一千七百餘員名卽回川境俟馬國銳
所帶添調之兵三千名到來再爲酌留二千名協同豐紳
在於沿邊一帶隨時探明截勦並可將山內零匪徧行搜
捕自不致顧此失彼其餘新兵仍令歸隊搭配以資征勦
臣額爾登保現帶撤勇回陝擬由兩扇門白土關沿山一
帶搜巡查察由興安前赴西安臣德楞泰卽督率滿漢馬
步官兵督催趕辦從此軍行輕捷不致爲賊匪牽掣亦不

致受老山之累實屬便於勦洗惟求假以時日力圖蕩平
諭曰額爾登保接奉節次諭旨遵將關防交與德楞泰接辦一面
卽將應撤之貴州官兵川楚鄉勇分別酌撤所辦甚是此時賊
匪東竄西奔大兵來往跟追徒勞無濟德楞泰現在擬分兵兩
路在山外左右夾擊自係酌量情形變通辦理此等機宜朕亦
不爲遙制但賊蹤詭譎旣知左右設伏恐難保其必由此兩路
奔竄德楞泰總當隨時酌辦設法圍攻務期一鼓殲淨摺內有
欲求假以時日力圖蕩平之言試思德楞泰自上年接手勦辦
以來遲至此日已逾半年之久尙得謂朕不假以時日耶此時
專交德楞泰辦理總看爾造化如果加倍奮勉督率將領官兵

趕緊勦辦能於八月內一律辦竣彼時奏到時朕不但將德楞泰前所降革爵賞仍行賞還並可格外施恩加以獎勵儻八月內尙未嚴事又復輾轉稽遲甚至又屆冬令彼時遲延之咎德楞泰自思能任否耶

又

諭曰德楞泰病體痊愈業已接受欽差關防並將搜捕餘匪事宜接手督辦勒保自無庸前往帶兵英善更無庸署理督篆惟糧餉爲兵行要需現在德楞泰統兵在川勒保當安爲籌備源源接濟不可有誤

二十四日

公奏言查賊匪前經官兵分路入山在謝家灣厚樸坪被
剿後連夜向大甯之新田壩桐油壩東北狂奔楊遇春豐
紳馬瑜田朝貴挑出趨健兵勇分投跟追抄截去後嗣臣
於初九日與額爾登保會合接受

欽差關防卽知照前敵各提鎮將領以賊旣竄出老山務宜趕緊
截剿勿令再竄進化龍山老林又爲費手並商同賽沖阿
將固原官兵歸併一路趕前繼進額爾登保與臣交代後
取道兩扇門回陝臣亦卽督兵東行十三日行抵界上老
鴉鋪接賽沖阿來信探知前敵在川陝交界之鳳凰寨剿
賊大獲勝仗已督兵抄出西北扼截隨接楊遇春豐紳馬

瑜田朝貴等報稱賊向東北狂奔官兵分投趕追初九日
翻大榆河老林至老鴉鋪探得賊竄川陝連界之大山老
林路通螞蝗壩平溪河若無兵迎截恐其深入陝疆或逼
向楚境彼此籌酌楊遇春豐紳等由偏巖子抄出賊前之
平溪河一帶截勦馬瑜田朝貴等由石板河尾追初十日
馬瑜田朝貴等翻越雙崎梁進至九道拐林內突有埋伏
賊匪自上撲下兵勇衝鋒競上與賊攬殺一處當斃賊三
名帶傷而逃者頗多賊衆退走偏橋子官兵直追至偏橋
子又有一起伏賊撲出接應勢急兇悍與官兵往來攻壓
三次槍斃執旗賊目一名賊衆又退上巖礎憑高擲石時

已日暮勢難得手卽於該處拏卡進逼是日楊遇春豐紳
督兵取道偏巖子由兩河口進溝穿林越箐酉刻趕抵水
洞子令官兵等暫息飽食卽於三更後發兵五更趕近平
溪河探報該匪乘夜正由二岔溪向鳳凰寨奔竄意圖攻
搶民寨楊遇春豐紳派令參將哈豐阿帶領都司呂天俸
守備吳順朱福壽等帶兵由寨左進攻令副將桂涵參將
馬文斌遊擊張拱辰畢萬年守備周澤洪張必祿等由寨
右進攻副將吳廷剛祝廷標帶守備齊慎馬柱周貴王興
等沿河抄擊三路並進賊匪膽敢分投抗拒官兵齊力直
前與賊廝戰一時之久愈戰愈勇立斃執旗賊目並矛手

十餘人生擒三十餘名賊遂敗上壠口復敢連壓數次又被我兵殲擒二十餘名楊遇春豐紳又復督催仰攻愈力適馬瑜田朝貴督率副將馬元馬應國參將羅思舉李應元遊擊劉彪馬成林都司周志林史定川等緊躡追來該匪腹背受敵我兵兩面夾攻又殺數名生擒十餘名該匪窮蹙始行慌亂鼠竄官兵仍分投追殺各有俘馘計兩次共斬擒賊匪一百五十名奪獲大小賊旗二十四面刀矛鳥槍一百六十餘件餘匪尙有二百多人向西北奔逃楊遇春等當令哈豐阿吳廷剛桂涵祝廷彪張拱辰等帶兵由平利之馬鞍山一帶抄前截勦令馬應國李應元劉彪

等跟蹤追蹤提集獲犯令其互相指認於活賊內認出僞元帥羅思蘭符庭富二名僞總管王宗福紀友亨蕭昌奉三名又於繳獻首級內認出僞元帥李如玉周天良二顆僞總管王仕奇並袁姓秦姓三顆均解送臣營查驗其餘均係弒手本擬解赴臣營訊辦因沿途半係老林恐有疎虞卽就近解交鎮坪文武嚴行看管以便提訊楊遇春等現仍督兵趕前勦辦等情並接賽沖阿來信亦已帶兵會同楊遇春等分投前進查餘匪勢已披靡臣已飛行賽沖阿楊遇春等趁此勝勢齊心努力如於化龍山外再得一兩仗卽可全數翦除一勞永逸此次痛勦賊匪所有擒斬

賊目賊夥之員弁兵勇照格分別給賞外惟查將佐員弁等於三月初二日在陡巖尖出力勦賊當蒙

恩旨飭令臣查明保列奏請

加恩嗣因賊蹤飄忽未獲大捷是以不敢遽請現在勦辦餘賊已屬無幾似應獎勵以鼓其氣臣卽知照該提鎮查明超衆出力員弁兵勇俟查報到時再行一併顰懇

諭

諭曰川省餘匪經官兵搜捕以來總在老山箐林潛竄德楞泰自三月間在陡巖尖奏捷一次迄今半年有餘該匪等恃險奔逸官兵未能痛加殲勦屢經降旨飭催今據奏稱本月十二日賊

匪竄至鳳凰寨經楊遇春豐紳等分兵三路併力並進鏖戰逾時賊匪敗上埢口適馬瑜等督率弁兵緊躡追來兩面夾擊計先後斬擒一百數十名並僞元帥僞總管多名可見搜捕日久鎮將弁兵尚非心存懈玩自因賊匪負距險阻兼以夏令雨水載途未能卽時得手此時賊匪甫出籌林卽能殲獲首夥多人大得勝仗官兵甚屬出力此尙係額爾登保在軍營時與德楞泰籌商布置調度有方前因伊二人督辦遲延曾降旨革去紫韁換戴單眼花翎俾知激勵茲捷書馳報自當卽沛恩施額爾登保德楞泰均賞還紫韁並雙眼花翎楊遇春豐紳馬瑜田朝貴均著交部議敘此外發去大荷包五對小荷包十箇四喜玉

搬指五箇白玉翎管五箇白玉鼻煙壺二箇瑪瑙鼻煙壺三箇
著交德楞泰分賞此次打仗出力各官員其尤爲出力者並著
據實保奏此次打仗兵勇俱著賞給一月錢糧並發去一兩重
銀牌一百面著查明兵勇內殺賊出力者格外賞給以示獎勵
現在零匪祇賸二百餘人業已披靡散竄德楞泰當乘此勝勢
督飭鎮將等齊心勉力再能痛殲一兩仗即可掃除淨盡朕在
山莊宵旰盼望回思去秋山莊與德楞泰講論軍務光景宛然
在目德楞泰應倍加奮勉迅速蒇事永承恩眷至此次生擒之
僞元帥羅思蘭等五名均係有名賊目罪惡稔著不可稽誅德
楞泰現交管押並著於提審後卽行懲辦以快人心其賊目苟

朝九尙無下落當隨時留心查訪以期必獲一經擒捕即當盡法處治速行馳奏嚴功完善勉之望之

恭錄

御製詩

成都將軍德楞泰奏報勦辦餘匪百餘名趕緊淨除餘孽

詩誌感慰

經時盼捷奏佳信至常山

是日駐蹕常山峪行宮

痛勦暝蝗孽深憐將士

艱八年役誠苦一鼓賊全刪感謝

蒼旻賜敷恩賞徧頒

去秋竄入南山之餘匪總在老山深箐之中覓食偷生本年三月經德楞泰於平利境內

痛勦之後潛匿不出雖經嚴飭辦事諸臣上緊掃除而地勢阻深天氣暑雨一時未能得手茲據德楞泰奏報賊經官兵搜殺

逼出老山向大甯東北狂奔德楞泰商令賽沖阿於本月初十日
前進自亦督兵東行於十三日接據賽沖阿報信知前敵在
川陝交界之鳳凰寨殺賊得勝並據前此額爾登保商派之楊
遇春豐紳馬瑜田朝貴等報稱伊四人彼此籌酌恐賊逸入陝
境復入老林楊遇春豐紳截堵於前馬瑜田朝貴追勦於後兩
路抄擊擒斬賊匪一百十餘名內有偽元帥總管賊目數名羅
思蘭一犯係羅其清之叔久爲教首尤屬狡惡今已生致大快
人心現在設法堵截不令竄匿老山再得一兩勝仗即可全數
翦除矣因卽加恩獎賞優賚俾各將士益思感奮

八月初三日

公奏言竊臣前將楊遇春豐紳等在鳳凰寨痛殲賊衆各
緣由於驗明首級耳記卽先行馳報後其擒獲各逆交鎮
坪文武看管者復函致賽沖阿令其撥兵護解前來昨准
額爾登保來信其時已行抵八仙河就近提犯審訊分別

辦理業由伊處奏

聞在案並恭錄六月二十九日

上諭以臣所患瘧痢較重著回至開縣上緊調治各等因移送前來臣跪讀之下感激莫可言喻謹卽叩頭謝

恩緣自春夏以來賊匪長在老山深林密箐晴雨不時鬱蒸之氣觸輒成疾加以賊蹤飄忽輾轉勦捕不能得手私心悚懼寢食靡甯前於五月下旬因冒暑奔馳染患瘧間日一發頗爲所苦卽於高坪暫駐令隨營辦事之縣丞屠祖型診視調治六月初旬幸卽瘧止時賊匪藏於貝母池老山負險不出臣卽督兵入山屯於十里坪扼截體未復元復

感陰沴之氣遂變而爲泄痢始則日夜無度穢及牀褥精神頗形委頓繼服湯藥度數漸減日就痊愈竊維賊氛未靖係臣應辦之事所患症候不過偶受溼熱雖疾甫新愈而勉力支持尚可照常辦事非如額爾登保之羸弱可比是以前往會合籌商一切後遵

旨卽令額爾登保回陝調治臣年屆六旬素不知有醫藥現雖病後胃氣不調胸膈脹滿步履稍遜於前然日服補劑有效復元自易勦捕一切仍逐日親爲運籌伏懇

聖慈稍紓

垂廩查賊蹤被馬瑜等緊躡尾追十四日在長溪河殺賊一名生

擒一名十七日又在羊腸溝一帶拏獲四名餘賊折向南來楊遇春豐紳遂督兵抄出兩扇門一帶迎剿賽沖阿亦帶兵繞出熟油溪該匪復又折而東逃由楊道士溝腦天工堰遁人化龍山內老林現在賽沖阿由竹谿河取道亢喜坡抄出東北面遏勦馬瑜田朝貴追至老鴉絆劉家臺向元嶺老林進剿距賊不過數十里楊遇春由八仙河繳子坪向西北逼截又探得慶成督同副將呢瑪善等帶兵在界上之石渣河一帶扼堵是陝境東北兩面及楚境均可無虞第該逆一經截剿勢必仍向西南而來當令豐紳卽在界上督同新調之馬國銳一路官兵分投探剿現探

川界之石梅子河有打散零匪二三十名在彼藏匿豐紳
已分兵前往搜捕又連日據副將羅聲皋等稟報清水寨
民勇甘榮等拏獲賊匪一名又據龍安府知府積朗阿稟
報因督催糧運行至茨竹溪探有散賊三十餘名在彼搶
掠當卽率同外委臧青雲軍功王良捕拏生擒董貴等五
名殺斃賊匪三名又藍翎軍功趙文相在劉家坪盤獲賊
匪三名現仍督同臧青雲等窮追搜捕又據達自祥稟報
盤獲賊匪一名又據羅江縣知縣米喬齡稟報擒獲零匪
四名又據署廣元縣知縣劉長庚等稟報拏獲零匪一名
又據總兵國興阿稟報外委徐光興在龍神崖盤獲賊探

一名又據本營各路哨探陸續拏獲逸匪四名均訊明分別辦理現在賊匪遁入化龍後山官兵分東西北三面抄勦俟此股賊匪辦竣則各處零匪亦可捕淨

諭曰此次各路捕獲餘匪共有二十餘名且有打散者二三十名看來賊勢已極渙散此時所贗不過百數十人再得痛剿一仗即可淨盡歲功但正股賊匪仍由天工堰遁入化龍山其爲首賊目自必在內今賽沖阿楊遇春等業已督兵分投三面抄勦德楞泰當飭知鎮將等上緊搜殲並嚴密查訪賊目究係何人留心躡獲至事竣以後川陝楚一帶邊界大山老林極多保無一二餘孽窮奔潛匿德楞泰當知照各該督撫選派幹員會同

前赴各山隘偏行排搜剗絕根株以期地方永臻甯靜德楞泰
病體初愈尤當於籌辦之暇善爲調攝爲國愛身以承恩眷再
昨據那彥成方維甸奏稱將來大兵全撤陝省尙須酌留一二三
千名並派大員帶領暫駐邊隘以資彈壓等語業經降旨諭令
會同額爾登保妥籌議奏因思川省地方情形自屬相同將來
撤兵以後應否先將客兵撤遣酌留本省兵丁若干名遴派何
員帶領如何分駐巡查彈壓之處亦不可不先事預籌並著德
楞泰與勒保會商定議奏聞

十三日

公奏言查勦賊匪二百餘人前由天工堰竄入化龍山

內意圖過楚臣卽督兵由長坪取道大小榆河直向東進
逐日分派員弁等沿途搜捕官兵分路兜截楚省慶成慶
溥兩路官兵探聞賊蹤亦均在界上防勦該逆遂連夜西
折向衝天礮老山遁去該匪日內被官兵分投兜截不能
擄掠陸續換散及逃出難民甚多人數愈少近又有走濫
河東奔松木溝八百溪老林之勢現在賽沖阿喜明由石
背河進至茅坪攔截馬瑜田朝貴由菜坪入山扼駐大屋
廠楊遇春由青龍溝老林翻化龍山向光頭山五佛庵尾
跟追勦擒獲賊探一名臣現駐鎮坪卽係東南扼要之處
又飛卽知會慶成慶溥等探明迎勦一經截住定可得手

又連日據派出沿途搜捕之員弁陸續拏獲零匪周伸等十二名臣訊據周伸等供稱我們元帥苟文潤自鳳凰寨被官兵殺敗後心甚害怕據來的人逃了不少就是老弒手也有私自走的苟文潤也管不住了總不過混得一天過一天等語訊明後均卽分別辦理又據九十稟報額外外委劉伸在南溪場盤獲逸匪一名於訊明後正法又准豐紳來信副將桂涵守備李思貴等跟追零匪四十餘名二十六日在光頭山殺斃賊匪一名生擒一名並現有由南溪奔竄之零匪二十餘名已派遊擊張拱辰都司余步雲帶兵四百名前往勦捕等情臣飭令將獲犯訊明正法

刻下賊勢愈形窮蹙不但被擄難民陸續逃散卽老賊亦有潛逃者約計股匪此時不過一百七八十名惟該逆自知死亡在卽詭譎愈甚朝東暮西時出時沒臣現又嚴催各路將領趕緊逼勦以期迅速蕪事

諭曰此次各路搜捕約又殲擒十數名餘匪益形窮蹙分向老山深林狂奔潛匿德楞泰督飭鎮將等設法追逼當茲秋涼氣爽之時山中已無雨水阻滯正可鼓勵將士共矢奮勉務於月內將此百數十名零匪悉數掃除勿再稽延賊匪等自知無路可逃詭譎愈甚或變易姓名冒充難民零星散逃希圖倖免德楞泰應飭知帶兵員弁隨時隨地留心訪緝毋任漏網其苟文潤

一犯尤當嚴密搜捕懸五賞格務在必獲卽臨陣被殲亦必查明確切據實奏聞至苟朝九是否卽係苟文潤抑或另係一人之處務須訪究實在下落方可憑信不可稍涉顙預致令要犯免脫昨據勒保奏稱於柏枝山地方拏獲苟朝九之子苟新兒可見苟朝九實有其人已諭令勒保督飭地方官認真盤詰並查拏散竄餘匪德楞泰亦無難就近咨會一體搜緝淨盡此起餘匪一經辦完計可卽日歲事德楞泰當由六百里馳奏用告

全捷

同日公又奏言竊

臣蒙

聖恩高厚俯念病軀

特命侍衛慶惠帶同

御醫胡增於診視額爾登保後卽赴開縣診視臣疾茲於二

十八日行抵鎮坪臣軍行已近次日謹卽趕到跪請

聖安叩謝

天恩訖伏念臣至微極陋仰荷

皇上豢養造就

畀以重任幸仗

天威將三省教匪大股掃除惟此餘孽日久稽誅竟不能迅報歲

事清夜自問罪戾實深迺沐

鴻施格外不加嚴譴而臣福薄運蹇咎積菑生轉至以犬馬之微

病上煩

宸心之廑念

御醫視疾

欽使同臨自顧何人不識何修渥叨

寵眷矜憐之意一至於此現因病後胃氣薄弱觸染風竇又患腹瀉而所餘賊匪已有賽冲阿等數路分追臣不過隨處調度是可無須親身進山況有

御醫診視方藥加緊調治當立可全愈復元荷

再造之深恩竊幸得逢於和緩念微軀之尙在誓當圖報於捐糜硃批汝不必親臨前敵加意督催速辦務於月內全完仍汝之功

調理痊可卽速具奏以慰塵注